

# 南無本師釋迦牟尼佛



## 方便品第二

爾時世尊從三昧安詳而起。告舍利弗。諸佛智慧。甚深無量。其智慧門。難解難入。所以者何。佛曾親近百千萬億無數諸佛。盡行諸佛無量道法。勇猛精進。名稱普聞。成就甚深未曾有法。隨宜所說。意趣難解。一切聲聞辟支佛所不能知。舍利弗。吾從成佛已來。種種因緣。種種譬喻。廣演言教。無數方便引導衆生。令離諸著。所以者何。如來方便知見波羅蜜皆已具足。舍利弗。如來知見。廣大深遠。無量無礙。力無所畏。禪定解脫三昧。深入無際。成就一切未曾有法。舍利弗。如來能種種分別。巧說諸法。言辭柔輒。悅可衆心。舍利弗。取要言之。無量無邊未曾有法。佛悉成就。止。舍利弗。不須復說。所以者何。佛所成就第一希有難解之法。唯佛與佛。乃能究盡諸法實相。所謂諸法如是相。如是性。如是體。如是力。如是作。如是因。如是緣。如是果。如是報。如是本末究竟等。

世雄不可量	諸天及世人	一切衆生類	無能知佛者
佛力無所畏	解說諸三昧	及佛諸餘法	無能測量者

本從無數佛	具足行諸道	甚深微妙法	難見難可了
於無量億劫	行此諸道已	道場得成果	我已悉知見
如是大果報	種種性相義	我及十方佛	乃能知是事
是法不可示	言辭相寂滅	諸餘衆生類	無有能得解
除諸菩薩衆	信力堅固者	諸佛聲聞衆	曾供養諸佛
一切漏已盡	住是最後身	如是諸人等	其力所不堪
假使滿世間	皆如舍利弗	盡思共度量	不能測佛智
正使滿十方	皆如須菩提	及餘諸弟子	亦滿十方剎
盡思共度量	亦復不能知	辟支佛利智	無漏最後身
亦滿十方界	其密如竹林	斯等共一心	於億無量劫
欲思佛實智	莫能知少分	新發意菩薩	供養無數佛
了達諸義趣	又能善說法	稠如稻竹葦	充滿十方剎
一心以妙智	於恆河沙劫	咸皆共思量	不能知佛智
不退諸菩薩	無數恆河沙	一心共思求	亦復不能知
又告舍利弗	無漏不思議	甚深微妙法	我今已具得
唯我知是相	十方佛亦然	舍利弗當知	諸佛語無異
於佛所說法	當生大信力	世尊法久後	要當說真實

告諸聲聞衆 菩薩緣覺等 我令脫苦縛 逮得涅槃者  
佛以方便力 示以三乘教 衆生處處著 引之令得出

爾時大衆中。有諸聲聞漏盡阿羅漢。阿若憍陳如等千二百人。及發聲聞辟支佛心四衆。各作是念。今者世尊。何故殷勤稱歎佛智。而作是言。佛所得法。甚深難解。有所言說。意趣難知。一切聲聞辟支佛所不能及。佛說一解脫義。我等亦得此法。到於涅槃。而今不知是義所趣。爾時舍利弗知四衆心疑。自亦未了。而白佛言。世尊何因何緣。殷勤稱歎諸佛成就第一。甚深微妙難解之法。我自昔來。未曾從佛聞如是說。今者四衆。咸皆有疑。唯願世尊敷演斯事。世尊何故殷勤稱歎。甚深微妙難解之法。

慧曰大聖尊	久乃說是法	自說得如是	力無畏三昧
禪定解脫等	不可思議法	道場所得法	無能發問者
我意難可測	亦無能問者	無問而自說	稱歎所行道
智慧甚微妙	諸佛之所得	無漏諸羅漢	及求涅槃者
今皆墮疑網	佛何故說是	其求緣覺者	比丘比丘尼
諸天龍鬼神	及乾闥婆等	相視懷猶豫	瞻仰兩足尊

是事為云何 願佛為解說 於諸聲聞眾 佛說我第一  
我今自於智 疑惑不能了 為是究竟法 為是所行道  
佛口所生子 合掌瞻仰待 願出微妙音 時為如實說  
諸天龍神等 其數如恆沙 求佛諸菩薩 大數有八萬  
又諸萬億國 轉輪聖王至 合掌以敬心 欲聞具足道

爾時佛告舍利弗。止。止。不須復說。若說是事。一切世間  
諸天及人。皆當驚疑。舍利弗重白佛言。世尊。唯願說之。  
唯願說之。所以者何。是會無數百千萬億阿僧祇眾生。曾見  
諸佛。諸根猛利。智慧明了。聞佛所說。則能敬信。

法王無上尊 唯願說勿慮 是會無量眾 有能敬信者  
佛復止。舍利弗。若說是事。一切世間天人阿修羅。皆當驚  
疑。增上慢四眾。將墜於大坑。

止止不須說 我法妙難思 諸增上慢者 聞必不敬信

爾時舍利弗重白佛言。世尊。唯願說之。唯願說之。今此會  
中如我等比。百千萬億。世世已曾從佛受化。如此人等。必  
能敬信。長夜安隱。多所饒益。



無上兩足尊 願說第一法 我為佛長子 唯垂分別說  
是會無量衆 能敬信此法 佛已曾世世 教化如是等  
皆一心合掌 欲聽受佛語 我等千二百 及餘求佛者  
願為此衆故 唯垂分別說 是等聞此法 則生大歡喜

爾時世尊告舍利弗。汝已殷勤三請。豈得不說。汝今諦聽。善思念之。吾當為汝分別解說。說此語時。會中有比丘比丘尼。優婆塞優婆夷五千人等。以佛威力即從座起。禮佛而退。所以者何。此輩罪根深重。及增上慢。未得謂得。未證謂證。有如此失。是以不住。世尊默然而不制止。佛告舍利弗。我今此衆。無復枝葉。純有貞實。舍利弗。如是增上慢人。退亦佳矣。汝今善聽。當為汝說。舍利弗言。唯然世尊。願樂欲聞。佛告舍利弗。如是妙法。諸佛如來時乃說之。如優曇鉢華。時一現耳。舍利弗。汝等當信佛之所說。言不虛妄。舍利弗。諸佛隨宜說法。意趣難解。所以者何。諸佛以無數方便。種種因緣譬喻言辭。演說諸法。是意非思量分別之所能解。唯有諸佛乃能知之。所以者何。諸佛世尊。唯以一大事因緣故出現於世。舍利弗。云何名諸佛世

尊。唯以一大事因緣故出現於世。諸佛世尊。欲令衆生開佛知見使得清淨故。出現於世。欲示衆生佛之知見故。出現於世。欲令衆生悟佛知見故。出現於世。欲令衆生入佛知見道故。出現於世。舍利弗。是為諸佛以一大事因緣故。出現於世。佛告舍利弗。諸佛如來但教化菩薩。諸有所作。常為一事。唯以佛之知見示悟衆生。舍利弗。如來但以一佛乘故。為衆生說法。無有餘乘。若二若三。舍利弗。一切十方諸佛。法亦如是。舍利弗。過去諸佛。以無量無數方便。種種因緣譬喻言辭。而為衆生演說諸法。是法皆為一佛乘故。是諸衆生從諸佛聞法。究竟皆得一切種智。舍利弗。未來諸佛當出於世。亦以無量無數方便。種種因緣譬喻言辭。而為衆生演說諸法。是法皆為一佛乘故。是諸衆生從佛聞法。究竟皆得一切種智。舍利弗。現在十方無量百千萬億佛土中諸佛世尊。多所饒益。安樂衆生。是諸佛亦以無量無數方便。種種因緣譬喻言辭。而為衆生演說諸法。是法皆為一佛乘故。是諸衆生從佛聞法。究竟皆得一切種智。舍利弗。是諸佛但教化菩薩。欲以佛之知見示衆生故。欲以佛之知見悟衆生

故。欲令衆生入佛之知見故。舍利弗。我今亦復如是。知諸衆生有種種欲。深心所著。隨其本性。以種種因緣譬喻言辭方便力。而為說法。舍利弗。如此皆為得一佛乘一切種智故。舍利弗。十方世界中尚無二乘。何況有三。舍利佛。諸佛出於五濁惡世。所謂劫濁。煩惱濁。衆生濁。見濁。命濁。如是舍利弗。劫濁亂時。衆生垢重。慳貪嫉妬。成就諸不善根故。諸佛以方便力。隱一乘佛。分別說三。舍利弗。若我弟子。自謂阿羅漢辟支佛者。不聞不知諸佛如來。但教化菩薩事。此非佛弟子。非阿羅漢。非辟支佛。又舍利弗。是諸比丘比丘尼。自謂已得阿羅漢。是最後身。究竟涅槃。便不復志求阿耨多羅三藐三菩提。當知此輩。皆是增上慢人。所以者何。若有比丘實得阿羅漢。若不信此法。無有是處。除佛滅度後。現前無佛。所以者何。佛滅度後。如是等經。受持讀誦解義者是人難得。若遇餘佛。於此法中便得決了。舍利弗。汝等當一心信解。受持佛語。諸佛如來。言無虛妄。無有餘乘。唯一佛乘。

比丘比丘尼 有懷增上慢 優婆塞我慢 優婆夷不信



如是四衆等	其數有五千	不自見其過	於戒有缺漏
護惜其瑕疵	是小智已出	衆中之糟糠	佛威德故去
斯人尠福德	不堪受是法	此衆無枝葉	唯有諸貞實
舍利弗善聽	諸佛所得法	無量甚深妙	不能為分別
但以方便力	而為衆生說	衆生心所念	種種所行道
若干諸欲性	先世善惡業	佛悉知是已	以諸緣譬喻
言辭方便力	令一切歡喜	或說修多羅	伽陀及本事
本生未曾有	亦說於因緣	譬喻並祇夜	優波提舍經
鈍根樂小法	貪著於生死	於諸無量佛	不行深妙道
衆苦所惱亂	為是說涅槃	我設是方便	令得入佛慧
未曾說汝等	當得成佛道	所以未曾說	說時未至故
今正是其時	決定說一乘	我此九部法	隨順衆生說
入一乘為本	以故說是經	我坐道場時	人天未來集
有佛子心淨	柔輒亦利根	無量諸佛所	而行深妙道
為此諸佛子	說是法華經	我記如是人	來世成佛道
以深心念佛	修持淨法故	此等聞得佛	大喜充徧身
佛知彼心行	故為說一乘	聲聞若菩薩	聞我今說法

乃至於一偈	皆成佛無疑	十方佛土中	唯有一乘法
無二亦無三	除佛方便說	但以假名字	引導於衆生
說佛智慧故	諸佛出於世	唯此一事實	餘二則非真
終不以三乘	濟度於衆生	佛自住一乘	如其所得法
定慧力莊嚴	以此度衆生	自證無上道	一乘平等法
若以三乘化	乃至於一人	我則墮慳貪	此事為不可
若人信歸佛	如來不欺誑	亦無貪嫉意	斷諸法中惡
故佛於十方	而獨無所畏	我以相嚴身	光明照世間
無量衆所尊	為說實相印	舍利弗當知	我本立誓願
欲令一切衆	如我等無異	如我昔所願	今者已滿足
化一切衆生	皆令入佛道	若我遇衆生	盡教以佛道
無智者錯亂	迷惑不受教	我知此衆生	未曾修善本
堅著於五欲	癡愛故生惱	以諸欲因緣	墜墮三惡道
輪迴六趣中	備受諸苦毒	受身至微形	世世苦增長
薄得少福人	衆苦所逼迫	入邪見稠林	若有若無等
依止此諸見	具足六十二	深著虛妄法	堅受不可捨
我慢自矜高	諂曲心不實	於千萬億劫	不聞佛名字

亦不聞正法	如是人難度	是故舍利弗	我為設方便
說諸盡苦道	示之以涅槃	我雖說涅槃	是亦非真滅
佛慧從本來	常自寂滅相	佛子行道已	來世得作佛
我有方便力	開示三乘法	一切諸世尊	皆說一乘道
今此諸大衆	皆應除疑惑	諸佛語無異	唯一無二乘
過去無數劫	無量滅度佛	百千萬億載	其數不可量
如是諸世尊	種種緣譬喻	無數方便力	演說諸法相
是諸世尊等	皆說一乘法	化無量衆生	令入於佛道
又諸大聖主	知一切世間	天人羣生類	深心知所欲
更以異方便	助顯一乘道	若有衆生類	值諸過去佛
若聞法布施	或持戒忍辱	精進禪智等	種種修福慧
如是諸人等	皆已成佛道	諸佛滅度後	若人善輒心
如是諸衆生	皆已成佛道	諸佛滅度已	供養舍利者
起萬億種塔	金銀及玻瓈	碑磔與碼碯	玫瑰琉璃珠
清淨廣嚴飾	莊校於諸塔	或有起石廟	栴檀及沉水
木檜並餘材	甑瓦泥土等	若於曠野中	積土成佛廟
乃至童子戲	聚沙為佛塔	如是諸人等	皆已成佛道

若人為佛故	建立諸形像	刻雕成衆相	皆已成佛道
或以七寶成	鍤鈿赤白銅	白鐵及鉛錫	鐵木及與泥
或以膠漆布	嚴飾作佛像	如是諸人等	皆已成佛道
彩畫作佛像	百福莊嚴相	自作若使人	皆已成佛道
乃至童子戲	若草木及筆	或以指爪甲	而畫作佛像
如是諸人等	漸漸積功德	具足大悲心	皆已成佛道
但化諸菩薩	度脫無量衆	若人於塔廟	寶像及畫像
以華香幡蓋	敬心而供養	若使人作樂	擊鼓吹角貝
簫笛琴箏篪	琵琶鐃銅鈸	如是衆妙音	盡持以供養
或以歡喜心	歌唄頌佛德	乃至一小音	皆已成佛道
若人散亂心	乃至以一華	供養於畫像	漸見無數佛
或有人禮拜	或復但合掌	乃至舉一手	或復小低頭
以此供養像	漸見無量佛	自成無上道	廣度無數衆
入無餘涅槃	如薪盡火滅	若人散亂心	入於塔廟中
一稱南無佛	皆已成佛道	於諸過去佛	在世或滅後
見聞異方便	皆已成佛道	未來諸世尊	其數無有量
是諸如來等	亦方便說法	一切諸如來	以無量方便

度脫諸衆生	入佛無漏智	若聞異方便	無一不成佛
諸佛本誓願	我所行佛道	普欲令衆生	亦同得此道
未來世諸佛	雖說百千億	無數諸法門	其實為一乘
諸佛兩足尊	知法常無性	佛種從緣起	是故說一乘
是法住法位	世間相常住	於道場知己	衆生根鈍故
不能信一乘	導師方便說	天人所供養	現在十方佛
	其數如恆沙	出現於世間	
安隱衆生故	亦說如是法	知第一寂滅	不為其宣說
以方便力故	廣說種種道	雖示種種道	其實為佛乘
知衆生諸行	深心之所念	過去所習業	欲性精進力
及諸根利鈍	以種種因緣	譬喻亦言辭	隨應方便說
今我亦如是	安隱衆生故	以種種法門	為示於佛道
我以智慧力	知衆生性欲	方便說諸法	皆令得歡喜
舍利弗當知	如來未出時	常念諸菩薩	即以佛眼觀
見六道菩薩	貧窮無福慧	入生死險道	相續苦不斷
深著於五欲	如犛牛愛尾	以貪愛自蔽	盲暝無所見
不求大勢佛	及與斷苦法	深入諸邪見	以苦欲捨苦



為是衆生故	而起大悲心	示現種種行	經於無量劫
方能成佛道	起而轉法輪	我始坐道場	觀樹亦經行
於三七日中	思惟如是事	我所得智慧	微妙最第一
衆生諸根鈍	著樂癡所盲	如斯之等類	云何而可度
爾時諸梵王	及諸天帝釋	護世四天王	及大自在天
並餘諸天衆	眷屬百千萬	恭敬合掌禮	請我轉法輪
我即自思惟	若但讚佛乘	衆生沒在苦	不能信是法
破法不信故	墜於三惡道	我寧不說法	疾入於涅槃
尋念過去佛	所行方便力	我今所得道	亦應說三乘
作是思惟時	十方佛皆現	梵音慰喻我	善哉釋迦文
第一之導師	得是無上法	隨順於我意	而用方便力
而我亦皆得	最妙第一法	為諸衆生類	分別說三乘
少智樂小法	不自信作佛	是故以方便	分別說諸果
雖復說三乘	意在教菩薩	舍利弗當知	我聞聖師子
深淨微妙音	稱南無諸佛	復作如是念	我出濁惡世
如諸佛所說	我亦隨順行	思惟是事已	即趣波羅奈
諸法寂滅相	不可以言宣	隱其真實義	隨順於諸佛

以方便力故	為五比丘說	是名轉法輪	便有涅槃音
及與阿羅漢	法僧差別名	從久遠劫來	讚示涅槃法
生死苦永盡	我常如是說	舍利弗當知	我見佛子等
志求佛道者	無量千萬億	咸以恭敬心	皆來至佛所
曾從諸佛聞	方便所說法	我即作是念	如來所以出
為說佛慧故	今正是其時	舍利弗當知	鈍根小智人
著相憍慢者	不能信一乘	今我喜無畏	於諸大衆中
正直捨方便	但說無上道	菩薩聞是法	疑網皆已除
千二百羅漢	悉亦當作佛	如三世諸佛	說法之儀式
我今亦如是	說無分別法	諸佛興出世	懸遠值遇難
正使出於世	說是法復難	無量無數劫	聞是法亦難
能聽是法者	斯人亦復難	譬如優曇華	一切皆愛樂
天人所希有	時至乃一出	聞法歡喜讚	乃至發一言
則為已供養	一切三世佛	是人甚希有	過於優曇華
汝等勿有疑	我為諸法王	普告諸大衆	但以一乘道
教化諸菩薩	無三乘弟子	汝等舍利弗	聲聞及菩薩
當知是妙法	諸佛之祕要	以五濁惡世	但樂著諸欲

如是等衆生	終不求佛道	當來三乘人	貪著三藏者
以為真實故	聞佛說一乘	迷惑不信受	破法墮惡道
對於如是人	切勿說斯經	有慚愧清淨	志求佛道者
當為如是等	廣讚一乘道	舍利弗當知	諸佛法如是
以萬億方便	隨宜而說法	其不習學者	不能曉了此
汝等既已知	諸佛世之師	隨宜方便事	無復諸疑惑
	心生大歡喜	自知當作佛	